

## **Z A P I S N I K**

**sa 10. (desete) Tematske sjednice Gradskog vijeća Bihać održane 11.05.2021. godine,  
(utorak) s početkom rada u 09:00 sati u Gradskoj vijećnici Grada Bihaća**

**Predsjedavajući**, Zulfikar Handukić, otvara sjednicu Gradskog vijeća i konstatira da je na sjednici prisutno 26 vijećnika, 4 vijećnika opravdano su odsutni.

Prisutni gosti:

Toromanović Ademir – direktor Zavoda za prostorno uređenje

Selimović Mehura – direktor JKP“Komrad“

Amarildo Mulić – direktor NP“Una“

Vladimir Mikovski – predstavnik IOM

Silvia Marone – predstavnik IPSI-a

Sabina Dervišević- predstavnik JRC

Muamer Delić – predstavnik CWS

Adela Šušnjar – predstavnik „Žene sa Une“

Zlatan Kovačević – predstavnik udruženja „SOS“

Selam Midžić – predstavnik Crveni križ Grada Bihaća

Za današnju tematsku sjednicu Gradskog vijeća, predsjedavajući predlaže sljedeći:

### ***Dnevni red***

- Prijedlog Zaključka o prihvatanju inicijative Kluba vijećnika „POMAK“ i vijećnice „Naše stranke“ Šeherzade Delić za održavanje tematske sjednice o stanju čistoće grada, onečišćenosti određenih područja grada od strane migranata odnosno onečišćenosti i nehigijene Grada Bihaća

Predsjedavajući današnji dnevni red daje na usvajanje.

Dnevni red usvojen je jednoglasno.

### ***Vijećnica Šeherzada Delić***

Inicijativa za održavanje tematske sjednice o onečišćenosti i ne higijeni Grada Bihaća koju je predala 22.02.2021.godine u ime „Naše stranke“

Obrazloženje:

„Trenutna higijenska pa prema tome i zdravstvena situacija našeg grada, vidna onečišćenost, gotovo nestale zelene površine, cvjetni otoci, ruševine napuštenih i zapuštenih objekata, urušeni i devastirani nedavno izgrađeni objekti, eko otoci, mjesta na kojima su postavljeni kontejneri za smeće i sami kontejneri, ulice, trgovi i parkovi, obale rječica i rijeka, bude u svakom građaninu osjećaj zatečenosti i ne prihvatanja stanja u kojem se našao i on sam i Grad Bihać.

Nedostojanstvenog, neprihvatljivog i ponižavajućeg stanja.

U uslovima svjetskog lockdown-a, pandemije corona-virusom, nedopustivo je da su naše ulice pretvorene u mahalske sokake zatrpane smećem i zarasle u višegodišnji korov, a krošnje stabala prepuštene slučajnom obrezivanju od vjetrova, kiša i snjegova.

Zbog toga, tražim da u roku od 15 dana, ovo Vijeće, zajedno sa Gradonačelnikom održi tematsku sjednicu na kojoj će svi, u ovaj problem involvirani akteri: predstavnici Javnih ustanova, Službi za komunalne djelatnosti, predstavnici MZ, građevinska i komunalna inspekcija, JKP Komrad, Zavod za prostorno uređenje, upravitelji zgrada, iznijeti svoje mišljenje, opisati probleme, reći stavove, te zajedno donijeti rješenje, zaključak ili obavezujući odgovor.“

### ***Vijećnik Elvedin Sedić***

Inicijativa za održavanje tematske sjednice o generalnom stanju čistoće i stvaranju divljih deponija u Gradu Bihaću u ime Kluba vijećnika „POMAK“.

Obrazloženje:

„Grad Bihać gradi imidž ekološkog i čistog grada i takva promocija izuzetno je važna za kvalitet života Bišćana, ali i za imidž grada Bihaća kao ekološke destinacije kojoj su jedne od komparativnih prednosti ekologija i održiv odnos prema prirodi. Trenutno stanje na terenu nije bajno, iskreno bojimo se da je u posljednjih nekoliko godina i nazadovalo, razloga je vjerovatno mnogo, a neki od njih su:

- izostanak dovoljne ekološke edukacije kod mlađih uzrasta
- slabo kapacitiran nevladin sektor koji bi ekološke teme plasirao u javni diskurs
- povećan broj nesavjesnih građana koji iz dana u dan prave nove divlje deponije, bez da za to budu sankcionisani
- izostanak dovoljne posvećenosti Gradske uprave da se sa ovom problematikom suoči i radi na poticanju njihovog dugoročnog rješavanja, itd

Mnogobrojni volonteri, Gradska uprava i njene ustanove posljednjih godina organiziraju proljetne akcije čišćenja, što je za svaku pohvalu, međutim iz godine u godinu dešavaju se isti problemi na istim mjestima, a dolazi i do stvaranja novih deponija, što brojne volontere koji svoje vrijeme daruju ovakvim akcijama demotiviše jer vide sve manji smisao u ekološkim akcijama ukoliko se neće raditi na dugoročnoj prevenciji ovog problema.

Posljednjih godina velik problem predstavljaju i migrantske rute koje su kontaminirale najljepše prirodne predjele kojima se kreće veliki broj rekreativaca, a koje su dio zelenog prstena grada Bihaća koji je prožet pješačkim i biciklističkim stazama i kao takav nudi dodatni sadržaj za sve naše posjetitelje.

Upravo na ovim stazama u mjesecu augustu bit će održano i balkansko prvenstvo u biciklizmu, što će slovit za jedno od najvećih takmičenja u posljednjem desetljeću u gradu Bihaću.

Ne možemo dopustiti da pred stotinama učesnika, našim posjetiteljima pošaljemo sliku zaprljanih šumskih puteva. S obzirom da postoje mnogobrojne organizacije koje brinu o statusu migranata, predlažemo da i one budu pozvane na tematsku sjednicu i preuzmu dio odgovornosti za ovaj problem koji muči građane grada Bihaća.

Kako bi se uhvatili u koštac sa ovom problematikom predlažemo da se u mjesecu aprilu sazove tematska sjednica Gradskog vijeća kako bi najviši zakonodavni organ grada Bihaća bio upoznat u tematiziranoj problematici, ali i dao svoj stav i doprinos u dugoročnom rješavanju ovog problema.“

***Vildana Zulić- pomoćnik gradonačelnika za strateško planiranje, upravljanje projektima, komunalne djelatnosti, vode i zaštitu okoliša***

Naglašava da postoje propisi koji se tiču ove materije, te da će u skorije vrijeme početi zbrinjavanje otpada. Ističe da će pratiti sve sugestije vijećnika na ovoj sjednici.

***Admir Toromanović – direktor JU “Zavod za prostorno uređenje“ Grada Bihaća***

Naglašava da „Zavod za prostorno uređenje“ ima svoj plan i program rada što se tiče čistoće, isto tako naglašava da je većinski problem onečišćenosti - migranti koji bacaju smeće. Naglašava da Zavod za prostorno uređenje Grada Bihaća, daje sve od sebe, a tako će nastaviti raditi sve što je u vezi segmenta čistoće.

***Mehura Selimović – direktor JKP „Komrad“***

Naglašava da je vijećnicima dostavljeno nekoliko prijedloga za zaključke i nada se da će ih vijećnici usvojiti uz svoje zaključke. Predlaže vijećnicima da u diskusiji i zaključcima navedu šta je čija odgovornost i kome treba da odgovara JKP „Komrad“.

***Gradonačelnik – Šuhret Fazlić***

Naglašava da po pitanju čistoće ima još stvari koje odgovorni za čišćenje mogu poboljšati ali isto tako svaki građanin je odgovoran za čistoću grada. Smatra da kao u primjeru nekih mjesnih zajednica, da trebaju i građani organizirati akcije čišćenja, isto tako će i preduzeća zadužena za čistoću organizirati se u svrhu boljeg rješavanja problema čistoće. Istakao je, da će biti kažnjen onaj ko prekrši Zakon o komunalnom redu. Naglašava da će biti očišćene javne površine ali vlasnici zemljišta moraju sami očistiti svoje parcele. Predlaže da jedan od zaključaka, obaveže i druge nadležne institucije na poduzimanje mjera povodom čistoće.

***Vijećnik Adnan Mekić***

Zahvaljuje se resornoj službi koja mu je dostavila odgovor na pitanje, spisak deponija na području Bihaća. Naglašava da ima 19 deponija na području Bihaća, te da se nekoliko deponija nalaze u blizini vodozahvata i područja obuhvata važnijih izvorišta vode. Mišljenja je da su izvorišta vode kontaminirana, ako se nešto ne poduzme po pitanju onečišćenosti grad Bihać će postati „grad smeća“. Naglašava da se nemarom po pitanju ogromne onečišćenosti stvara jako loša slika o gradu Bihaću.

***Vijećnica Šeherzada Delić***

Smatra da za rješenje problema onečišćenosti treba dobra strategija i raspodjela poslova. Naglašava da je stanje gore nego što je navela u svojoj inicijativi.

***Vijećnik Adnan Lipovača – poslovnička intervencija***

Ističe povredu Poslovnika o radu, jer je predsjedavajući najavio nakon obraćanja Gradonačelnika da će se obratiti direktor Nacionalnog parka i predstavnici Međunarodnih

organizacija. Traži isti redosljed kao na prethodnoj tematskoj sjednici u vezi Doma Zdravlja predstavnici su se obraćali prije vijećnika.

#### ***Vijećnik Nijaz Malkoč***

Pohvaljuje savjete mjesnih zajednica i gradske službe koji su mjesec dana vodili akciju „April mjesec čistoće“. Također zahvaljuje se JKP Komrad, Zavodu za prostorno uređenje, rafterima koji su čistili rijeku Unu i svojoj mjesnoj zajednici koja je isto učestvovala u navedenoj akciji. Predlaže da po pitanju ove teme izlagač treba biti služba za mjesne zajednice da navede koliko je uklonjeno divljih deponija uz pomoć mjesnih zajednica i šta se je radilo u mjesecu aprilu. Traži od nadležnih institucija da se uklone migranti iz parka, kamp Sedra da bude zatvoreni kamp da migranti ne napuštaju taj kamp, jer su migranti uništili, onečistili okolnu plažu. Poziva predstavnike da izađu na teren i da zajedno sa mjesnom zajednicom završe čišćenje tog dijela. Poziva organizacije zadužene za migrante da im dijele hranu po kampovima, a ne da to rade van kampova zbog smeća koji migranti ostavljaju za sobom. U vezi čišćenja grada poziva Gradsku i USK inspekciju da obiđu putne komunikacije, utvrde stanje i barem kazne one koji ne čiste svoje parcele koje se nalaze pokraj puta i kanala.

#### ***Vijećnik Adnan Lipovača***

Naglašava da mu je žao što na današnjoj sjednici nisu prisutni predstavnici Veterinarske stanice, Vodovoda i Stanouprave. Pohvalio je rad kolege vijećnika Adnana Mekića na čiju su inicijativu prošle godine čistili put uz Zavalje. Smatra da nisu samo migranti problem i da postoji kolektivna odgovornost građana Bihaća po pitanju odlaganja smeća. Isto tako je pohvalio rad Komrada i naglasio da je u razgovoru sa direktorom Komrada došao do saznanja da je JKP Komrad u velikim problemima kad su u pitanju tehničko-materijalne stvari, te da su pokušali preko Evropskih fondova da dobiju jedan kamion za selekciju otpada. Smatra da grad Bihać treba imati ciljeve projekta - održivo gospodarenje otpadom, te da treba krenuti sa čišćenjem, pranjem cesta kao što je bilo prije. Također smatra da Gradsko vijeće na čelu sa direktorima JU, JP i Međunarodnih organizacija moraju izraditi studiju planiranja i upravljanja gradskim zelenilom.

#### ***Vijećnica Elvira Selmanović***

Podržava u potpunosti inicijativu povodom koje je zakazana sjednica, te smatra da je grad imao i ranije problem sa kolektivnom sviješću i prije dolaska migranata. Ističe da se i ranije zalagala da se osmisli emisija o kulturi življenja kolektivnog stanovanja, pa je zaključila da se ne radi na edukaciji djece u tom smjeru. Divljih deponija je bilo i prije dolaska migranata, te je potrebno graditi kolektivnu svijest kod migranata, u smislu da je potrebno da očiste iza sebe kada se premještaju na drugo mjesto. Zato predlaže da predstavnici međunarodnih organizacija, traže od migranata da iza sebe očiste kada idu na drugu lokaciju.

### ***Vijećnik Armin Amidžić***

Naglašava da iako stanje nije bajno po pitanju čistoće ipak je mišljenja da je grad Bihać jedan od najčistijih gradova u BiH. Smatra da su svi krivi za onečišćenost jer kako naglašava samo kukamo i jadikujemo o onečišćenosti a ne poduzimamo nikakve mjere i ne priključujemo se akcijama čišćenja. Mišljenja je da su kajakaši, rafteri, planinari i pojedinci poput njegovog kolege vijećnika Adnana Mekića dežurni čistači, a ostali se samo žale i tako misle da su nešto uradili po tom pitanju. Traži da služba i grad naprave spisak kontaminiranih deponija u Nacionalnom parku i okolnih ruta, zatim da Gradska uprava napravi plan i spisak lokacija deponija isključivo od strane migranata, te da svi zajedno rade na sanaciji zelene zone Plješevice i Nacionalnog parka „Una“.

### ***Vijećnik Edin Bašagić***

Nije za to da se sjednica pretvori u kukanje i da se prebacuje problem samo na migrante. Smatra da je problem prisutan u zadnjih deset godina. U zaključcima koje donosi Gradsko vijeće nema prijedloga o sortiranju otpada, nema prijedloga o uređenju grada, nema pranja ulica, nema sadnje cvijeća. Ističe da će podržati svaku ideju koja će pokrenuti rješavanje nastalih problema.

### ***Vijećnica Rusmira Konjević***

Smatra da faktori koji utječu na onečišćenost grada su prvo migranti, preduzeća Komrad i Zavod za prostorno uređenje, građani, inspekcija i neupravljanje otpadom. Mišljenja je da su to neke smjernice koje treba navesti u zaključcima. Naglašava da prateći rad mjesnih zajednica, da su one jako puno uradile po pitanju čišćenja i da se grad ipak čisti. Naglašava da su stabla u okruženju zgrada zapuštena i mišljenja je da treba građane educirati ko da sredi ta stabla, da li vlast ili građani. Smatra da brigu o okruženju pojedinih stambenih jedinica kolektivnog stanovanja treba prebaciti na korisnike tih objekata, te da se taj odnos jasno definiše propisom.

### ***Vijećnik Alen Zulić***

Ističe da treba pojačati inspekcijsku službu sa većim brojem komunalnih redara. Također, da treba napraviti medijsku kampanju odnosno upoznati građane sa konkretnim brojem telefona pomenute službe koja će biti aktivna u periodu sve dok se aktualna problematika ne razriješi. Isto tako, da treba omogućiti građanima da sudjeluju u rješavanju predmetnog problema na način da se određeni komunalni prekršaji u smislu naplate istog u određenom procentu naknade isplata usmjeri prema onome ko je taj prekršaj prijavio.

### ***Vijećnik Elvedin Sedić***

Mišljenja je da imaju 4 ključne tačke u vezi ove problematike. Naglašava da je prva tačka zajednička komunalna potrošnja, odnosno problem koji ovaj dio sa sobom nosi, zatim druga tačka je kabasti otpad, građevinski šut i ogrijevno drvo koje se slaže ispred zgrada

kolektivnog stanovanja, zatim treća tačka su migranti i otpad koji oni ostavljaju iza sebe i četvrta tačka je uklanjanje divljih deponija i stvaranje uslova da se one ne otvaraju ponovo. Naglašava da su tri od četiri tačke problem koji mi sami generiramo a samo jedna tačka pada na populaciju migranata. Smatra da je neophodno raditi na unaprijeđenju svijesti naših sugrađana kako bi vodili računa o svojoj životnoj okolini u kojoj žive.

#### ***Vijećnik Edin Felić***

Naglašava da problem onečišćenosti treba podijeliti u dva dijela, te na taj način usmjeriti zaključke o kojima će razgovarati. Naglašava, da je jedan dio problema nesavjesno odlaganje svih vrsta otpada od strane građana, te kako iznaći rješenja u vidu pomoći JKP Komrad u prikupljanju otpada, posebno krupnog otpada. Drugi dio problema su migranti na gradskim ulicama, na putevima i putnim pravcima odnosno kako je to nazvano „rutama“. Ističe, da u prvom dijelu problema građani u velikom broju nesavjesno odlažu otpad na mjesta koja nisu za to predviđena. Smatra da po tom pitanju kazne treba povećati. Također smatra da treba građane osvijestiti da prijavljuju te počinioce. Smatra da po pitanju deponija na području grada Bihaća, da Gradsko vijeće sa gradskim službama a isto tako i kantonalnim službama mora hitno iznaći način da se pomenute izmjeste. Naglašava da drugi dio problema bacanje smeća od strane migranata je izuzetno ozbiljan problem i vjeruje da će se organizacije koje upravljaju migrantskom krizom maksimalno uključiti.

#### ***Vijećnik Sulejman Kulenović***

Smatra da treba usvojiti prijedlog zaključaka Gradskog vijeća na temu poboljšanja čistoće grada Bihaća. Gradsko vijeće treba da traži povećani intenzitet aktivnosti JKP Komrad na održavanju javne higijene i zelenila grada Bihaća i da se JKP Komrad podrži finansijski. Pohvaljuje rukovodstvo Nacionalnog parka „Una“ na uređenju istog. Smatra da treba razmisliti o izgradnji javnog wc-a, zatim uređenja gradskog mezarja „Humci“, uređenja kapela i uređenja drugih mezarja u gradu i da to sve bude u nadležnosti JKP Komrad. Predlaže da se u ovo vrijeme pandemije češće ulice peru radi poboljšanja higijensko-epidemioloških mjera.

#### ***Vijećnik Halil Bajramović***

Slaže se da su problemi ogromni i dobro je da svi kritikuju, odnosno za su jedinstveni po pitanju čistoće. Smatra da je bilo dovoljno pet godina da se pozicija organizira. Naglašava da je žalosno da se toliko godina u Regionalnu deponiju ulagalo, da bi ona bila ugašena. Misli da su Zaključci Komrada dobri, ali i zabrinjavajući, kao što je deponija za animalni otpad na Gorjevcu. Mišljenja je da bi se trebala uvesti Komunalna policija. I prije 2018.godine, odnosno i prije dolaska migranata Bihać ima navedene probleme, te smatra da je potrebno aktivirati Regionalnu deponiju.

### ***Vijećnica Lejla Bakrač***

Mišljenja je da treba odvojiti čistoću grada, pa će ta pitanja postaviti putem vijećničkih pitanja, a na današnjoj sjednici će se osvrnuti na onečišćenja zbog migrantske populacije. Pošto je upućena u probleme stanara okolnih zgrada „Doma penzionera“, mišljenja je da nema smisla čekati Federalne vlasnike pomenutog objekta, potrebno je preko Ministarstva sigurnosti obezbijediti sredstva kako bi se angažirale domaće firme da očiste zgradu, nakon što se migranti izmjestite na dugu lokaciju. Nakon toga bi se zatvorio, odnosno zazidao donji dio navedenog objekta. Druga ideja je da se organizira čišćenje rute kuda prolaze migranti kada pokušavaju preći u EU (Žegar-Zavalje-Duga Luka). Odnosno da se od sredstava međunarodnih zajednica, putem domaćih firmi a u suradnji sa sportskim aktivistima, organizira uređenje tih staza, da se postave kante za smeće i klupe.

Predsjedavajući GV, zatvara raspravu i poziva goste da se obrate

### ***Amarildo Mulić – direktor NP „UNA“***

Zahvaljuje se inicijatorima na utvrđenoj temi, koja je veoma bitna za građane, za privrednike odnosno za sve prisutne goste. Smatra da ništa ne počinje od danas, bilo je problema i prije. Pitanje smeća i otpada je prvo pitanje kućnog odgoja, zatim civilizacijskog odgoja svakog pojedinca ili grupe ljudi, prema prirodi, društvenoj stvari, privatnoj stvari. Naravno da se problemi neće riješiti preko noći, nijedna institucija, nijedan pojedinac, ali može se sistemski pristupiti tom rješavanju. Deponije su činjenica u zadnjih 30 godina, na svakom koraku, gdje postoji mogućnost pristupa čovjeka ili prikolice, ali pojedinac ne može se boriti sa tim. Komunalni problemi, komunalni projekti ne treba da budu poligon za političke bitke, nadmudrivanja, jer je to zajednički problem, pošto komunalnu infrastrukturu koriste svi. Nacionalni park je prije 4 godine dostavio tačne pozicije deponija, do danas nije se ništa uradilo na reakciji, tako da ima puno priče a malo organiziranog djelovanja. Osnov za razvoj NP je očuvanje prirode, uređenje okoliša. Potrebna je sinergija sa Kantonom i bilo je potrebno da na sjednicu bude pozvan ministar prostornog uređenja, zaštite okoliša iz Kantona, zatim Veterinarski zavod pošto imamo i onečišćenja tla kroz poljoprivredu. Smatra da je potrebno napraviti Akcioni plan sa širom grupacijom ljudi, te preći sa riječi na djela.

### ***Vladimir Mitkovski – predstavnik IOM-a***

Organizacija podržava ovakve inicijative GV za bolju čistoću i higijenu Grada. Prvo se osvrnuo na statističke podatke, pa je rekao da je od 25.11.2018. godine samo kroz centre USK-a prošlo 30.564 migranta, od toga u prosjeku samci su boravili do 2 mjeseca, porodice od 100-120 dana. U centrima Grada Bihaća, boravilo je 20.890 migranata (tu se ne broji „Sedra“ jer teritorijalno pripada Cazinu ali svi znaju da migranti pretežno borave u Bihaću). Na današnji dan u samom Bihaću boravi nešto ispod 1000 migranata. On smatra da ove cifre koje je naveo, nisu nikakav problem što se tiče higijene, te da imaju jako dobru saradnju sa direktorom Komrada, sa svim lokalnim kompanijama. Ističe da je veliki posao obavio JKP

Komrad, te da nisu problem centri za migrante, zato što su oni organizirani isto tako i odvoz smeća. Problem je ono što se događa izvan centara. IOM ima jedan program koji se provodi radi praćenja migranata u više od 50 zemalja svijeta. U isti dan se broje migranti na svim lokacijama da ne bi bilo preklapanja u brojanju, tako da je na primjer u prošli petak napravljena vježba, te da je u FBiH na taj dan registrirano 3.220 migranata van centara. Od toga 2.413 su boravili u USK-u. Tako da je svima jasno da USK nosi najveći teret, a posebno grad Bihać. Ponovio je da nije problem kada su migranti u centrima ali je problem kada su migranti vani, odnosno koji nemaju smještaj. U toku je izgradnja kampa Lipa odnosno proširenje kapaciteta, a koji će biti kontejnersko naselje sa kapacitetom za 1.500 migranata. Na taj način bi riješili jedan problem odnosno dio problema za ukupno 1.500 migranata (1000 samaca, 300 članova porodica i 200 djece bez pratnje).

Nakon toga je izložio, šta su dosad uradili i šta imaju u planu. Od početka migrantske situacije IOM nije radio samo u centrima organiziranim, nastojali su koliko toliko da podrže lokalnu zajednicu, mjesnu zajednicu što se tiče higijene. Za Komrad je nabavljeno 240 kanti za smeće, 50 velikih kontejnera za smeće, 1 kamion doniran Bihaću, 1 doniran Cazinu, radilo se na uređenju parkova sa klupama i u centru i kod Borića. I dan danas se organizuje čišćenje parkova na sedmičnom nivou. Kada su u pitanju materijali za edukaciju, ti materijali su prevedeni na sve jezike iz zemelja po porijeklu odakle dolaze migranti, tako da im se objašnjava koliko je bitno za građane grada Bihaća, ovaj grad, ova rijeka i da se to treba čuvati. Smatra da je potrebno da se radi i malo više. Zatim je istakao da se aktivnosti sa migrantima izvan kampa koordiniraju sa Službom za poslove sa strancima i kantonalnim Crvenim križom kako bi išli na unaprijed određene lokacije pri tome se isključivo pridržavaju preporuka Službe za poslove sa strancima i njihovim unaprijed odobrenim planom. Zatim je još jednom istakao izvrsnu koordinaciju sa Službom za poslove sa strancima, CK, JP, mjesnim zajednicama, Nacionalnim parkom, stavio je naglasak na potrebu plana, može se zvati i Akcioni plan, ali da to bude projekat u kojem bi oni surađivali i koji bi oni podržavali i finansijski i na sve moguće načine, te da nema nikakvih problema u organizaciji u centrima. Organizacija IOM-a je tu da pomogne državi, zato jer država upravlja migrantskom krizom odnosno Ministarstvo sigurnosti preko Službe za poslove sa strancima.

### ***Silvija Marone – organizacija IPSI-a***

Zahvalila se na pozivu u ime organizacije, te je spomenula da dolazi iz Italije, međutim dugo već živi u Bihaću, pa se smatra pola Bišćankom. Njena organizacija je dugo u gradu, bavili su se različitim projektima a zadnje 3 godine bave se migracijama. Prije su imali projekte razvoja turizma, zaštite okoliša tako da su surađivali sa mladima tokom akcija čišćenja. Tako da je ova tematika vrlo bitna za cijeli grad. Kao Talijanka istakla je da ovakav problem koji grad Bihać ima naročito na Plješevici, ruti koju koriste migranti prilikom pokušaja prelaska u EU, ima i Italija iznad Trsta, postoji nacionalni spomenik, zaštićena zona. Svake godine se na toj lokaciji pojavi isti problem, od maja mjeseca do novembra, nađe se gomila stvari, cipela jakni itd. Ispričala je kako se to riješava u Italiji. Ona smatra da se to



ne može lako riješiti ni tamo se to ne riješava lako. Iste se stvari ponavljaju u Sloveniji, u Hrvatskoj i u Srbiji. Kada su ljudi u pokretu, isti se problemi pojavljuju. Ali je istakla da je razlika u tome što su te rute poznate u Italiji i te rute se redovno čiste. Smatra da je potrebna edukacija o zaštiti okoliša i ova organizacija radi u centrima, ne radi van kampa, zajedno sa IOM i CK grada Bihaća. Organizacija pokušava dati podršku gradu Bihaću u smislu projekata koji bi vrijedili i u budućnosti. Ova organizacija je obezbijedila i novu cisternu gradu Bihaću. Uputila je savjet što se tiče rute na Plješevici, od aprila do novembra, to se mora redovito čistiti volonterskim akcijama zajedno sa JP, jer to sigurno migranti sami neće.

#### ***Sabina Dervišević – organizacija JRS***

Cilj ove organizacije je rad u kampovima za one migrante koji imaju potrebu za ljekarskom i zdravstvenom zaštitom, tako da članovi ove organizacije idu kao kulturni medijatori i prevoditelji. Članovi organizacije djeluju na lokaciji koje su dozvoljene operativnom grupom, tako da se i njihov najveći projekat odvija ispred kancelarije, kada se migranti vraćaju sa neuspjelog prelaska granice, oni dolaze ispred kancelarije po novu garderobu i hranu. Ističe specifičnost za ovu organizaciju, a to je da migrantima ne daju nikakve pakete koji se kasnije bacaju, a sa migrantima komuniciraju na njihovim maternjim jezicima, te dobiju isključivo ono što im je u tom trenutku potrebno. I ova organizacija je spremna da se uključi u akciju čišćenja prema planu gradske uprave, JP-a odnosno po zajedničkom dogovoru na onim lokacijama na kojima djeluju.

#### ***Muamer Delić – organizacija JWS***

Ističe da organizacija radi u kampovima i van kampova, te da imaju dobre odnose sa lokalnom zajednicom i svim nivoima države. Podržavaju sve govornike koji su učestvovali na današnjoj sjednici i spremni su da se uključe u zajedničko rješavanje, te se stavljaju na raspolaganje, kada se napravi akcioni plan. Oni će se nastaviti baviti migrantima kako u kampovima tako i izvan kampova.

#### ***Adela Šušnjar – organizacija Žena sa Une***

Organizacija djeluje unutar kampa u suradnji sa IOM i CK. Također ističe volju da učestvuju u zajedničkom rješavanju ovog problema, a kroz zajedničke akcije čišćenja.

#### ***Zlatan Kovačević – organizacija SOS***

Ovo je organizacija sa volonterima koji su osvješteni i dobro znaju šta je zaštita okoliša. Ističe da svakodnevno čiste Plješevicu, te kaže da se ne radi samo o jednoj ruti, da ih ima više. Oni imaju različite aktivnosti, između ostalog plaćaju svaku vreću smeća koju migrant donese, zatim pružaju medicinsku pomoć na relaciji Bihać-Lipa, te vrše otkup plastične ambalaže. Članovi njegove organizacije stavit će se na raspolaganje svaki put kada bude organizirana akcija.

### ***Selam Midžić – Crveni Križ grada Bihaća***

Istakao je da se slaže sa svim izrečenim i kao član CK i kao građanin. I da se samo zajedničkim naporima može rješavati ovakav problem. Iznosi ideju da se oformi radna grupa koja bi razgovarala sa donatorima o problemima na terenu pošto je očito da će ovi problemi trajati duže pa je potrebno da se pristupi planski.

### ***Vildana Zulić – pomoćnik gradonačelnika za strateško planiranje, upravljanje projektima, komunalne djelatnosti, vode i zaštite okoliša***

Ističe da je Pregled svih deponija u gradu Bihaća od 2010.-2015. godine, služba ažurirala, tako da su sa spiska uklonjene one deponije koje su očišćene i sanirane, a na spisak su stavljene nove deponije koje su otvorene. Navodi da je posebno problem kada se deponija očisti ali nakon 2 dana ponovo na istom mjestu nastaje smetlište. Podržala je ideju direktora Komrada kako bi se postavio video nadzor i povećale kazne za prekršitelje koji budu otkriveni. Grad Bihać sada ima 5 komunalnih inspektora ali su pokrenuli inicijativu prema kantonalnom ministarstvu kako bi se izmijenili kriteriji za ta radna mjesta, u smislu da bi komunalni redar imao veće zaduženje u radu komunalne inspekcije. Po pitanju akcije mjesec april, grad Bihać je uputio svim udruženjima, upraviteljima zgrada, velikim prodajnim centrima, Gradskom sportskom savezu, Udruženju poslodavaca, obrtnicima, te su ih zamolili da doniraju sredstva i da se uključe u akciju, odnosno kako bi u svojim budžetima planirali sredstva za narednu godinu a ta bi sredstva se koristila isključivo za čišćenje zelenih i ostalih površina. Na narednoj sjednici u planu je Prijedlog Odluke o izmjenama i dopunama Odluke o komunalnom redu, u smislu da se komunalnim inspektorima olakša provođenje upravnog postupaka. Smatra da bi se trebalo više raditi na svijesti, edukaciji djece, ali ne samo djece nego svih građana. Zatim je istakla problem animalnog otpada koji se nepropisno odlaže iz klaonice. Nakon toga je istakla da je GV krajem februara usvojilo Akcioni plan za 10 narednih godina u kojem je jedna od mjera primjena održivog upravljanja energijom za koji je grad Bihać planirao budžetom 100.000 KM u te svrhe. Na kraju je istakla da će grad u narednom periodu donijeti plan upravljanja otpadom, to je ustvari zakonska obaveza a on se radi za period od 5 godina. U donošenje tog dokumenta neće biti uključeni samo vijećnici nego sve organizacije koje se bave migrantima.

### ***Mehura Selimović – direktor JKP Komrad-a***

Zahvalio se svim prisutnim vijećnicima i gostima, na njihovim konstruktivnim sugestijama i idejama. Zatim je zamolio vijećnike da temeljito analiziraju zaključke koje je predložio JKP“Komrad“, pošto smatra da su konstruktivni. Izrazio je zadovoljstvo, pošto tokom sjednice niti u jednom momentu se nije osjetilo politiziranje.

### ***Zulfikar Handukić – predsjedavajući GV***

Pozvao je sve vijećnike koji su predložili zaključke da u vrijeme pauze, izvrše analizu i utvrde prijedlog zaključka.

Nakon analize predloženih zaključaka predsjedavajući daje na glasanje prijedlog

### Zaključak

Obzirom da je provedena iscrpna rasprava o predloženim zaključcima na poduzimanju aktivnosti za poboljšanje čistoće grada Bihaća, Gradsko vijeće traži od predlagača zaključaka da dana 20.05.2021. godine u 13,00 sati održe sastanak na kojem će se sublimirati svi predloženi zaključci, te uputiti Gradskom vijeću na usvajanje.

Zaključak je usvojen jednoglasno sa 24 glasa „ZA“

Obzirom da je iscrpljen dnevni red predsjedavajući zatvara sjednicu u 13h 28min.

Predsjedavajući Gradskog vijeća  
Zulfikar Handukić